

## Ո Ր Ո Շ ՈՒ Մ

Ճանապարհային ոստիկանության վարչական իրավախախտման վերաբերյալ գործով  
15.04.2022թ. կայացված ԱՖ908072 որոշումն անփոփոխ, իսկ վարչական բողոքն առանց  
բավարարման թողնելու մասին

<< 20 >> 05 2022թ. 7-13- 5633

ք.Երևան

Ճանապարհային ոստիկանության պետ, ոստիկանության գնդապետ Ե.Կարապետյանս,  
վերանայելով Վլադիմիր Սարգսյանի ՄԴ/25765-22 դիմումի քննարկման արդյունքում ստեղծված  
նյութերը՝

### Պ Ա Ր Զ Ե Ց Ի

Քաղաքացի Վլադիմիր Սարգսյանը (**ծանուցման հասցե՝ Արարատի մարզ, գյուղ Այնթապ, 3-րդ փողոց, 32/2 տուն**) դիմումով խնդրել է հնարավորության սահմաններում ընդառաջել և  
բեկանել Ճանապարհային ոստիկանության վարչական իրավախախտման վերաբերյալ գործով  
15.04.2022թ. կայացված ԱՖ908072 որոշումը՝ նշելով, որ վարելու ընթացքում ոստիկանության  
ծառայողների կողմից կանգնեցվել է ավտոմոբիլը և տեղեկացել է, որ զույգ հաշվառման  
համարանիշներից առջևի համարանիշը բացակայում է, որից հետո դուրս գալով ավտոմոբիլից  
տեսել է առջևի հաշվառման համարանիշը ընկել և կորել է:

Դիմումի քննարկման արդյունքում պարզվել է, որ վարչական իրավախախտման վերաբերյալ  
գործով 15.04.2022թ. կայացված ԱՖ908072 որոշումը ենթակա է կատարման հետևյալ  
պատճառաբանությամբ.

<<Ճանապարհային երթևեկության անվտանգության ապահովման մասին>> օրենքի 18-րդ  
հոդվածի 1-ին մասի <<ը>> կետի համաձայն՝ վարորդին արգելվում է վարել կեղծ, փոխված կամ  
ստանդարտին չհամապատասխանող հաշվառման համարանիշներով (ժամանակավոր  
համարանիշների դեպքում՝ նաև ժամկետանց համարանիշներով) կամ առանց հաշվառման  
համարանիշների:

Վարչական իրավախախտումների վերաբերյալ << օրենսգրքի 123.5-րդ հոդվածի 16-րդ մասի  
համաձայն՝ զույգ հաշվառման համարանիշեր ունեցող տրանսպորտային միջոցը մեկ  
հաշվառման համարանիշով վարելը՝ առաջացնում է տուգանքի նշանակում՝ սահմանված  
նվազագույն աշխատավարձի քսանապատիկի չափով:

Ուսումնասիրությամբ պարզվել է, որ քաղաքացի Վլադիմիր Սարգսյանի վարած <<BMW>>  
մակնիշի 51KK050 հաշվառման համարանիշի տրանսպորտային միջոցը Երևան քաղաքի Րաֆֆու  
փողոցում 24.03.2022թ. ժամը՝ 10:00-ին կանգնեցվել է Պարեկային ծառայության Երևան քաղաքի  
գնդի 1-ին գումարտակի 2-րդ վաշտի պարեկ, ոստիկանության լեյտենանտ Ռոբերտ  
Եղիազարյանի և նույն վաշտի ավագ պարեկ, ոստիկանության ավագ լեյտենանտ Ռազմիկ  
Ղարիբյանի կողմից՝ ավտոմոբիլը մեկ հաշվառման համարանիշով վարելու համար, ինչից հետո  
պարեկ Ռ. Եղիազարյանը կազմել է վարչական իրավախախտման վերաբերյալ թիվ 8180116827  
արձանագրությունը: Միաժամանակ պարեկային ծառայողները հայտնել է, որ իրենց և վարորդի  
միջև ծառայողական բնույթի խոսակցություններից բացի այլ խոսակցություններ չեն եղել:

Պարեկային ծառայության Երևան քաղաքի գնդի վարչական գործունեության բաժանմունքի  
պետ, ոստիկանության մայոր Ն. Թադևոսյանը 30.03.2022թ. թիվ 91/1-533 գրությամբ վարչական  
իրավախախտման վերաբերյալ թիվ 8180116827 արձանագրությունը ուղարկել է Ոստիկանության  
Մարտունու բաժին՝ հետագա ընթացքը լուծելու համար:

Քաղաքացի Վլադիմիր Սարգսյանը 15.04.2022թ. ներկայացել է Ճանապարհային ոստիկանություն, որտեղ Ճանապարհային ոստիկանության 2-րդ սպայական գումարտակի 4-րդ սպայական վաշտի 1-ին սպայական դասակի վարչական պրակտիկայի ավագ տեսուչ, ոստիկանության փոխգնդապետ Հ. Հարեյանը կազմվել է վարչական իրավախախտման վերաբերյալ արձանագրություն: Վլադիմիր Սարգսյանը արձանագրության մեջ նախատեսված տեղերում ստորագրել է, ինչից հետո Հ. Հարեյանը ղեկավարվելով Վարչական իրավախախտումների վերաբերյալ ՀՀ օրենսգրքի 123.5-րդ հոդվածի 16-րդ մասով կայացրել է վարչական իրավախախտման վերաբերյալ գործով ԱՖ908072 որոշումը:

<<Ճանապարհային երթևեկության անվտանգության ապահովման մասին>> օրենքի 17-րդ հոդվածի 1-ին մասի <<ա>> կետի համաձայն՝ ճանապարհային երթևեկությունը կարգավորող ոստիկանության ծառայողը պարտավոր է սույն հոդվածի երրորդ մասով սահմանված կարգով ազդանշան տալով կանգնեցնել տրանսպորտային միջոցը, եթե ակնհայտ կամ տեխնիկական միջոցների օգտագործմամբ երևում է, որ վարորդը խախտել է ճանապարհային երթևեկության կանոնների պահանջները, կամ տրանսպորտային միջոցի ընթացքը կամ տեղափոխվող բեռը, կամ վարորդը կամ ուղևորներն իրենց վարքագծով ակնհայտորեն վտանգ են ստեղծում երթևեկության անվտանգության համար: Նույն հոդվածի 8-րդ մասի համաձայն՝ երթևեկության սահմանված արագության գերազանցման և տրանսպորտային միջոցների ապակիների լուսաթափանցելիության սահմանված չափի խախտումների համար պատասխանատվություն է առաջանում, երբ տվյալ խախտումը փաստարկված է համապատասխան տեխնիկական միջոցների կիրառմամբ:

Ինչ վերաբերվում է դիմումատուի խնդրանքին՝ իրեն ընդառաջելու վերաբերյալ, ապա ՀՀ Սահմանադրության 6-րդ հոդվածի 1-ին մասի համաձայն՝ պետական և տեղական ինքնակառավարման մարմիններն ու պաշտոնատար անձինք իրավասու են կատարելու միայն այնպիսի գործողություններ, որոնց համար լիազորված են Սահմանադրությամբ կամ օրենքներով, տվյալ պարագայում կատարված վարչական իրավախախտման համար պատասխանատվությունից ազատելու կամ ընդառաջելու որևէ իրավական ընթացակարգ սահմանված չէ:

Այսպիսով, դիմումատուի արարքում առկա են Վարչական իրավախախտումների վերաբերյալ ՀՀ օրենսգրքի 123.5-րդ հոդվածի 16-րդ մասի հատկանիշները, ուստի ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով՝

### Ո Ր Ո Շ Ե Ց Ի

1. Ճանապարհային ոստիկանության վարչական իրավախախտման վերաբերյալ գործով 15.04.2022թ. կայացված ԱՖ908072 որոշումը թողնել անփոփոխ, իսկ վարչական բողոքն առանց բավարարման:
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան՝ օրենքով սահմանված կարգով և ժամկետներում:
3. Սույն որոշման օրինակն ուղարկել Վլադիմիր Սարգսյանին:



Ե.Կարապետյան